

L'Europa è naschida en il temp medieval

Da Constantinus als chavaliers cruschads

DA GUIU SOBIELA-CAANITZ

■ «En l'Europa moderna survivan (...) las iertas da la Grezia antica, da l'imperi roman e dal cristianissem. Sper lezzas funtaunas principales stattan las iertas decisivas dals Celts, dals Germans e dals Slavs, sco er ina contribuzion araba» (1). La Grezia antica e l'imperi roman è svanids; il cristianissem survivia en persunas, gruppas e cuminanzas da noss mund secularisà, ma la cristianitad è morta; quai ha renconuschì il filosof catolic Emmanuel Mounier (1905–1950) en ses essai «Feu la chrétienté» («La cristianitad barmiera»). Il poet romantic Friedrich von Hardenberg «Novalis» (1772–1801), en ses essai «Die Christenheit oder Europa», ha idealisà lezza societad dals temps medievals, fritg d'ina penetraziun successiva iniziada da l'imperatur roman C. Flavius Valerius Constantinus († 337). Ilos nundumbraivels missiunaris medievals han pia stgaffi ina pitga da nossa cultura. Il medievist Lutz von Padberg (Universitat da Paderborn) ha gisti publitgà l'ediziun tastgbla actualisada da sia «Christianisierung Europas im Mittelalter» (2) nua ch'el resumescha milli onns da missiun cristiana enfin al 14avel tschientaner. Grazia al register pon ins duvrar lez cudeschet sco ovra da consultaziun, tant pli ch'el cuntegna pliras chartas istoricas fitg cleris. El dat pia in buna survista d'in millenni multifar en in'Europa multifara.

Triumf en il quart tschientaner

L'autur punctuescha en sia introducziun: «L'Europa era l'emprim in tarpun pezzà d'etnias, culturas e religiuns ina sper l'autra, ina seria senza coesiun unitara, pia era senza passà cuminacivel. Pir la cristianisazion (...) ha stgaffi quella uniun intima che furma l'Europa (...).

En il quart tschientaner han ins dauzà il cristianissem al rang da religiun statala. Quai ha favorisà ils missiunaris; per la paja ha lur messadi s'allontanà dals ideals da la cuminanza cristiana oriunda. Las transiziuns trantre la cretta pregiada e la voluntad politica èn daventadas uschè confusas che la Baselgia è vegnida ad aquella da s'identifitgar cun l'imperi (...). Ilos umans n'hant betg mo survegnì ina cretta nova, mabain er ina cultura nova (...). Cun la vieuta da la politica religiosa imperialia ha il quart tschientaner manà a la Baselgia in triumpf, sco er in augment enorm da ritgezza e pussanza» (pp. 9–11 e 23). Quai è stà l'ovra da l'imperatur Flavius Theodosius († 395). Ma ses successors han partì l'imperi en duas mesadads; quella dal vest han conquistà pievles germans en il 5avel tschientaner. «En l'Imperi oriental èn il stadi e la Baselgia vegnids ad aquella da furmar in'unitad che ha survivà enfin al 15avel tschientaner (...). La personalitat principala è stada l'imperatur Justinian (527–565); el era perswas che Dieu l'haja incaricà da reger tutt affars mundans e spirituals (...) sco reprezentant da Cristus sin terra» (pp. 26–27).

Emprims battens da retgs germans

Ils Germans han aboli l'Imperi roman dal vest, ma la Baselgia antruras imperialia ha survivà en ses uestgbs. Quests èn vegnids ad aquella d'integrar ils pievles germans en la cuminanza ecumenica da la cristianitad: «Adam valeva sco quel progenitur da tutt carstgauns che haja introduci il putgà en il mund; dentant possia Cristus spendrar tutt (...). La ruiна da las relaziuns ordinadas muntava ina sfida per il cristianissem» (p. 32). L'emprim uestg che ha budagnà la sfida è stà quel da Reims en la Gallia dal nord: S. Remigi u Romedi († var 530) ha batteggià 498 il retg franco Ludivis (Clovis per flam e franzos, Chlodwig per tudestg) ensem cun traiamilla aderents.



«Ludivis saveva pia (...) fusiunar ils Gals romanisads ed ils Francos ad in pievel (...). Il cristianissem è plinavant vegnì pusplè la religiun uffizial (...). Amez la cultura religiosa medievals stevan oramai la messa latina e la veneraziun dals apostols romans (...). Gia tar l'emprimisa 511 ad Orléans han ils uestgbs acceptà la supremazia dal retg (...). I na deva vairamain betg ina Baselgia francona, mabain plis centers da cult dominads dals uestgbs e da las elites locatas ed unids da la pussanza roiala» (pp. 58 e 60–61). Ulterius retgs germans han lura survegnì il batten, numnada main il burgognais 517, il gotic da Toledo 587, ils englaids ed il langobard en il 7avel tschientaner.

Latgna via celtica

Il num da s. Gagl fa endament in dals episodis ils pli remartgabels dal temp medieval, numnadama in svilup da las claustras irlandaises e lur derasaziun sin il continent europeic. «L'Irlanda era situada en mintga regard a l'ur dal mund. Ils Romans na l'avevan betg conquistada (...). Dentant èn ils Irlandais vegnids cristians gis en quel moment ch'invasiuns pajaunas oppimevan lur vischins britannics (...). Las plaivs irlandaises dependevan d'associazions claustrals e da lur sontg fundaturs. Empè d'uestgbs eran ils avats ils models religius dal pievel irlandais; (...) sia Baselgia era atgnamain ina confederaziun da claustras (...). Abraham aveva bandunà sia parentella e patria per suandar il clom da Dieu (Genesis 12,1); tenor ses exempli han muntgs irlandais (...) pregià l'Evangeli a l'ester per spendrar lur atgna olma (...). S. Columban è vegnì il pli enconuscent. Dal 590, cun il dumbar biblic da dudesch cumpogns, ha'l entschavà a viagiar per il continent enturn» (pp. 67–70). El ha fundà pliras claustras en la Gallia da l'ost e lur a Bobbio en l'Emilia, nua ch'el è mort 615; ses

cumpogn Gagl († var 650 ad Arbon/TG) ha fundà la claustra che porta ses num.

Signur da l'imperi cristian

Il retg franco ed imperatur «roman» Carl il grond († 814) numn'ins savens «il bab da l'Europa» (v. La Quotidiana dals 21 da fanadur 2009). 796 ha'l gratulà al papa nov elegì scrivend: «Noss duair, cun l'agid da la misericordia divina, è da defender da cuntin la sontg Baselgia da Cristus cunter l'invasiun dals pajauns e las devastaziuns dals nuncartents e da la rinforzar a l'interior cun l'enconuscentscha da la cretta catolica. Voss duair, sontgadad, è d'auzar ils mauns vers Dieu, sco Moses, sustegnend l'effizienza da nossas armas cun vossas uraziuns, per ch'il cumond e la grazia da Dieu dettian adina la victoria al pievel cristian» (cità p. 109). La rigur da Carl encounter ils Saxons, t. a. l'execuziun da millis d'els dal 782, «dastg'ins strusch conciliar cun princips cristians» (p. 101). Da l'autra vart è la Baselgia vegnida «purtadra da cultura e da furmaziun (...). Ins ha introduci ina scrittura ch'ins pudeva leger en tut l'imperi, la renumada „minuscula carolingica“ che ha remplazzà las differentas, scritturas naziunalas; perquai dovra l'Occident anc adina ina scrittura cuminaciva. Lur han ins stgaffi texts uschenumnads autenticis per ils differents dievers da la vita ecclesiastica; il capodovora è stà la revisiun da la Bibla tras Alcuin, (...) model da var tschient Biblas copiadis en l'emprimisa mesadad dal 9avel tschientaner cun var 900 paginas en format 50 x 35 cm (...). Carl ha cumandà da duvrar il linguatg dal pievel: (...) Ils spirituals stuevan translatar ed interpretar per il pievel analfabet» (pp. 107 e 112–113).

Slavs, Scandinav, Ungariais

Bler pli duraivla è dentant stada la lavour da traducziun per la cristianisazion da

pievles slavs, e quai pressapauc ad ost da duas lingias fictivas, ina da Vilnius a Kosice (Slovakia) e l'autra da Pécs a Split (Croazia). Constantín Ciril († 869) e Metod († 885), dus frars da Tessalonici, han creà l'emprim linguatg standard slav, basà sin il dialect anc pauc differenzià da Macedonia. Constantín Ciril ha stgaffi in alfabet derivà dal grec «ch'ins ha pli tard simplifitgà sco cirilic. Ilos dus frars, cun l'agid da lur students, han translatà parts da la Bibla, la liturgia e texts dals babs da la Baselgia e dal dretg ecclesiastic (...). Papa Adrian II († 872), pli perdert che blers da ses successors, ha lubì la liturgia slava» (pp. 147–148). Probablamente enturn 880 ha Metod batteggià il retg da Boemia. Gia 865 aveva il retg bulgar Boris († 907) survegnì il batten ed il num cristian da Mitgel. Gnancia tschient onns pli tard, dal 955 ha Olha († 962), princesa slava da derivanza scandinava (Helga), survegnì il batten sco Elena. Ella regeva quel vast imperi numnà «Rusj» che tanscheva dal Golf da Finlanda enfin al Mar nair. Ses biadi Volodimir († 1015) è vegnì batteggià Basil (986) sco figiol da l'imperatur d'Orient (Constantinopel) ch'è prest vegnì era ses sir. Las invasiuns mongolas dal 13avel tschientaner han partì la populaziun da Rusj plaut a plaut en ils traïs pievles dals Bieloruss, Russ ed Ucrania. Enturn 966 ha il retg polac Mieczko († 992) survegnì il batten. El ha testà ses reginam al papa sez; perquai ha la Pologna surpiglià la messa latina. Il prinzi ungarais Vajk († 1038) è vegnì batteggià Stephan. Er ils reginams nordics han surpiglià il cristianissem tenor il model tradizional, pia cun il batten da lur retgs. L'Islanda perencunter era naschida 930 sco republica; 999 ün tutt commembers da ses parlament vegnids batteggiads.

Destruziun u conversiun

«En il 12avel tschientaner han ils fundaments da la situaziun sa midads tuttafatg. Las populaziuns surabundantas da l'Europa dal vest han entschavi a colonizar plaut a plaut las regiuns orientalas cun pli paucs avdants. Quai ha promovi era la cristianisazion. Prinzis, urdens da chavallaria e muntgs tudestg han schlarijì il domini imperial enfin al 15avel tschientaner fin lunsch encounter l'ost. Igl era il temp da las cruschadas. Lur spiert instigava l'ardiment dals missiunaris cunter ils pajauns. Ins duvrava pia dapli violenza che tar buna-mattutadas interpresas anteriuress da cristianisazion. La Baselgia manegiava ch'il destin fatal dals pajauns saja la perdiu eterna pervi da lur maletg da Dieu tuttafatg different. Perquai cartev'ins da stuair als sfurzar si il cristianissem sche pliras emprovas passchaylas na gartegiavan betg» (p. 169–170). Uschia han ins «cristianisà» ils Sorbs. Cunter lezs ha avat Bernard da Clairvaux (1090–1153) pregia la cruschada cun fieu e flomma ils 19 da mars 1147 tar la dieta imperialia da Frankfurt, cun la benedicziun da papa Eugen III (...). Destruciun u conversiun! Uschia tunava la letga crudaiva proclamada dal predicator. Destruciun na muntava natiralmaint betg ch'ins duaja extirpar il pievel sorb, mabain mo sia religiun pajauna; ma tgi avess savì distinguer en in'atmosfera uschè sullevada?» (pp. 173–174).

Sper il Mar baltic

Dal 13avel tschientaner èsi i medemainen in Lettonia ed Estonia. 1196 è Albert von Buxhoeveden († 1229), anteriu rectur da la scola dal dom a Bremen, vegnì uestg d'Ikskila (Lettonia). El ha obtegnì dal papa la proclamaziun d'ina cruschada en il Balticum. «1200 èl arrivà a la sbuccada dal flum Daugava cun missiunaris, commerziants e chavaliers cruschads; là ha'l fundà Riga dal 1201» (p. 180). El ha lura spustà l'uestgju en

quella citad e stgaffi in nov a Tartu (Estonia). A medem temp ha l'Urden dals chavaliers tudestg conquistà in vast intschesch tranter il reginam da Pologna ed il Mar baltic; 1309 ha il general da l'urden stabili sia chapitala a Marienburg, oz Malbork en Pologna. En il Nordost da lez territori, numnà pli tard Prussia da l'ost, han ins fundà 1252 Memel, oz Klaipeda en Lituania. Il rest da Lituania furmava in principadi cun parts da l'anterior Rusj. Pir 1386 ha princi Jogailas († 1434) vegnì batteggià e cun quai era renconuschì sco retg da Pologna, fundond il reginam dubel da Pologna–Lituania.

Ina cuminanza da valurs

A la fin dal 14avel tschientaner cumpliava la cristianitad in intschesch che tanscheva da Cipra a l'Islanda e da Nischni Novgorod en Russia a Sagres en l'Algarve. I mancava mo pli la Laponia pajauña ed il reginam arab islamic da Granada. Ma quant enavant astg'ins numnar lezza cristianitad «Europa»? L'istoricher Wolfgang Schmale (Universitat da Vienna) commentescha: «Igl è fitg pauc precis, e perquai fitg dubius, da sa referir en general a „la“ ragischa cristianas da l'Europa (...). Per nus oz sa tracti tuttina da l'Europa, perquai che nus resguardain sco relevants quels elements culturals cuminaivels. I stgaffeschian in'identidad istorica pli u main veglia ch'avischina per uschè dir Finnais e Spagnols (...). L'Europa n'è betg in object sco ina mai-sa u ina chasa. Quai ch'ins numnava „Europa“ durant millennis n'è mai restà identic. Il sguard uman ha adina pusplè midà, spustà, schlarijì, sminù u parti lez „insatge“ (...). Da l'illuminissem enfin ad oz monta „Europa“ ina cultura; dapi la seconda guerra mondiala representant'ins l'Europa plitost sco in'identidad» (3). L'autur circumscriva in element essenzial da quella identidad europeica, tirond endament la «crisa austriaca» da 2000, cur che 14 dals 15 stadii commembers da l'UE han truà decisamain la participaziun da la dretga extrema (FPÖ) a la regena federala dal 15avel stadii, l'Austria: «Ils puncts critics (...) pertutgavan il coc da quai ch'ins numna la cuminanza europeica da valurs: Dretgs umans, umanitat, toleranza, democrazia ed ina distanza clera e netta en fatscha al faschism ed a quel nazissem che ha manà a la „schoa“ (...). Areguard lur motivs han lezs 14 stadii agì en armonia cun la memoria istorica europeica (...). In sguard critic sin ils candidats a l'adesiun a l'ost da l'actuala UE dat da patratgar: Co stati cun la memoria istorica da lur societads? Quai che fa dapi tema n'è betg lur relaziun cun il passà communist, mabain la creschientscha da lur partidas antisemiticas e da la dretga extrema. Era quai fa part da la crisa europeica» (4). Quai scriveva Schmale dal 2001. Set stadii da l'anterior «bloc da l'Ost» fan part da l'UE dapi 2004, auters dus dapi 2007. En singuls da lezs ha la crisa economica evocà ils demunis dals onns quaranta. Per la paja constatti era ch'i na sa palesa en quels pajais nagina forza politica da pais che less turnar enavos tar la societad communista. Ma dan under provegn quel spiert che vul eliminar u schizint extirpar ina part da la populaziun pervi da sias atgnadads? N'è'l betg in resun dal clom: «Destruciun u conversiun! ch'instigava ils cruschads ad ost da l'Elbe avant set tschientaners?

1. André Reszler en: Neue Helvetische Gesellschaft (ed.) e Roberto Bernhard (red.), *Zwischen Einigkeit und Zweisprache. Turiq e Cuira* (Rüegger, ISBN 978-3-7253-0944-3) 2010, p. 48.

2. Lutz E. von Padberg, *Die Christianisierung Europas im Mittelalter. Segunda edizioni repubblicata ed aktualisata*. Stuttgart (Philipp Reclam jun., ISBN 978-3-15-018641-1) 2009.

3. Wolfgang Schmale, *Geschichte Europas*. Vienna – Cologna – Weimar (Böhlau, ISBN 3-8252-8213-9) 2001, pp. 13–15.

4. Wolfgang Schmale (sco nota 3), pp. 287–288.